

金華黃先生文集

十



金華黃先生文集卷第三十四

續藁三十一

墓誌銘

門人編次

項可立墓誌銘

予為項君可立銘其大父墓後六年而君卒又九年而葬又三年而君之子師周始以狀走京師問銘於予會予方有史事及得謝而歸又三年乃克為之君姓項氏諱詞可立字也其先自台之仙居徙溫之永嘉後復自永嘉徙台之臨海臨海故為章安縣今所居章安即舊縣所治也五世祖璣高祖惠曾祖駟當宋南渡初遭時多故並隱弗仕大父良材鄉貢進士予所為作銘者也妣翟氏張氏父鼎迪功郎蜀郡虞公集銘其墓妣毛氏由迪功而上考諸前銘可見已初君之大父有德於里中人至今思之

國兵南伐偶為卒所得將剗刃焉忽撓而曲易以

他刃復然卒駭曰此天所保護必有積德後當生好人遂舍之而去及君之生質貌魁偉自少侗尚氣皆與大父類人以為好人之驗稍長卓然有志於古不妄與人交所造詣必一時名人嘗為詩持以謁天游陳先生孚一見稱其善學李長吉君蓋未之學特暗與之合耳時君甫弱冠天游謂曰子固他日之善鳴者觀其丰茸間婉若明金翠羽流麗雲屏能稍加鞭辟入於義理則其緣飾萬物之情當變而為鏗鏘清廟之音矣遂介之見此廬翁先生森又介此廬見右堂陳先生天瑞而卒業焉既而歸讀書於嵩隱嵩隱者五世祖德處也去家僅一里所由山麓緣綫路上絕磴穿石扉而入群峰環合中更平衍清池方竹超然如在世外四方士友及里中子弟負笈而至者傾所儲以給之無少厭歲饑人多採草根木皮以食有虎出為害君移文誚

山神而逐之是夕虎至舍外據地大吼林風震撼崖石迸落少
選聲漸悲俄悄然無聞開戶視之屏迹去矣君藏脩息游於其
間者十年於書無不讀而薦好經學謂聖人修六經始以明人
倫於道之常終以扶世教於道之變易首乾坤先陽後陰君臣
之常道正矣終於未濟則陰陽失位非變乎書始於二典堯之
遜位於舜君道之正也終以秦誓繼王者之誓非變乎詩始於
二南周之以服事殷臣道之正也終以魯頌繼天子之頌非變
乎至於禮壞樂崩則春秋不得不作首書元年春王正月正始
也末書西狩獲麟示變也聖人之示變於其終所以俟後聖復
常道於已變也又以為六經之有春秋脩道立教之義剖斷始
明尤致意焉延祐初有詔著取士令郡縣起居就試於鄉
闈而君雅不喜效新進之士作科場語以求合有司之繩尺故

屢試而屢却未始以得失為欣戚也君素為吳越間學者所敬服爭奉禮幣迎致而師事之父客于外行橐所有悉送于家以具甘旨一豪不敢私達官大人有欲薦之於朝者辭以母老不可遠遊而止季弟某從君游久既壯為之授室其費一以身任之永康胡先生長孺號廉介休官而家益貧寓杭之青蓮佛舍以殯君夙為所獎重經紀其喪事甚力哀輯其遺文將刻梓以行而未果也中歲不踐塲屋歸侍親庭杜門不出遇風日清美間與一二勝流盤礴金鰲峰上而寄情於漁釣人或繪為金鰲釣隱圖其歆慕之如此嘗患渴竟以其疾至於大故君生於前至元戊寅某月某甲子卒於後至大戊寅五月丙午享年六十有一臨終屬續神色不亂語師周曰吾與爾永訣矣吾母垂白在堂而不得盡終養之孝爾年甫及成童而不得盡撫育之恩

吾既為明時棄物以就磨滅爾當竭力奉吾母以及爾母厲志
於學以無忝前人勉乎哉傷乎哉言訖而逝母哭之慟絕而復
蘇弔者皆哭盡哀俟殯畢乃退娶王氏後十年卒子男一人即
師周陳氏出也女二人適王光讓黃應驄師周卜宅兆於臨海
保樂鄉安仁里鳳山五世祖墓之側以至正七年冬十一月己
卯奉君柩葬焉君所著有春秋纂義二十卷詩文若干卷藏於
家君歿師周年纔十五凡狀所述多所於君仲弟某而得之也
予與君為文字交非一日君生後於予而先予死予之庸謏諄
毫固不足任吾友不朽之託然以師周不遠四千里奉君治命
而來有請業已心許之安可無以存掛劍之義乎銘以慰君亦
以慰其嗣人云爾銘曰

天之生物其成實難胡底于成而卒棄捐有木於斯植彼中野

由其萌芽至于拱把沐浴時雨膏液也豐行柯布葉干雲蔽空人指其材可梁可棟工師睨焉乃不有中委而弗取老于丘園斧斤所赦山林之尊不侈其逢寧不謂命保茲歲寒順受其正于嗟乎君不幸類之全夫天年何成何虧鳳山之原墓草既宿輟哭書辭用慰幽躅

呂府君墓誌銘

府君諱汲字仲脩姓呂氏呂氏於嬖為著姓而非一族人因以其所居地望為別居永康縣之太平鄉者號太平呂氏宋之中葉有以經學教授于鄉里者曰遵遵之子曰質質之子曰迪功郎師愈仇家構飛語中其長子約而連及之父子同時與龍川陳公俱下天獄次子皓先以賑濟受知倉君使朱文公奏補郡文學用漕薦再上春官時年二十有四叩匭上書乞納所得官贖

父兄罪丞相白無例孝宗正色曰義事安用例立命出之緣坐得釋者五十餘人幼子源是為府君五世祖累贈通直郎高祖諱介曾祖諱羔皆承節郎祖諱堃承信郎父諱懋咸淳間嘗與計偕試禮部入

皇朝版授知永康縣至元十五年也母何

氏知樞密院兼叅知政事夢然之從孫女府君少嗜學至老不懈讀書務窮理而於百家數術靡不旁通其說平居致養於親為具必豐族人不能自食者月有廩年當入學者家有塾列為成規守而不廢子女婚嫁必擇故家名族未嘗論財接賓友情文兼至各盡其歡而止鄰里有急必周之歲大侵為粥食餓者所全活以千百計至於自奉乃極簡薄衣無美飾食無珍味器用苟完出入無僭從惟以一僮挾策自隨人望之蕭然山澤之癯也其恭儉出於天性孝友行於家庭仁愛及於宗族鄉黨可

見者如此而又多材能遇事明敏所處必中於理衆咸厭服為人排難解紛勇於赴義不以為憚里中無賴之徒或假私鹽誣平民蔓延所及甚衆為之力辨於官以免人尤德之初知縣公遭值江南新附官府未立毅然出任縣事而弗辭既撫定其民使無失業且為之捍衛以備非常人恃以安及朝廷置真令即奉身而退蓋志在用權以全其鄉井不藉是為進取之階也其後大盜竊發官庫進討復強起之以為嚮導府君甫踰弱冠實預在行身踐重山密林荒昧阻絕之境而直探其巢穴事平口不言功識者推其雅量晚益務韜晦自號水西翁云前娶朱氏鄉貢進士環之女先四十三年卒後娶趙氏叅知政事資政殿大學士順孫之女先若干年卒子男三人長曰梓本伯兄之子次曰權曰機皆朱氏出府君既早失內助二子又幼弱因鞠梓

為已子俾持門戶事而悉畀以知縣公所遺田宅權既長遣從鄉先生許公益之受學八華山中業成未及見於用而先府君十五年卒無子府君以繼躰之重為之斬衰三年仍命以機子烜為之後而機亦先府君三年卒女二人適同邑陳至寶東陽胡道隆孫男七人熙忠燧炯燁烜煥女四人曾孫男六人女九人府君生於宋咸淳四年戊辰閏月三日乙卯卒於今至正六年丙戌二月三日壬子享年七十有九諸孫以其年十一月三十日癸酉奉柩合葬于東陽縣西部鄉西郭先室朱氏之墓而以狀來謁銘昔歐陽子有言為善無不報而遲速有時予觀水心葉公銘迪功之墓曰治生能富教子能賢後溪劉公銘通直之墓曰宗族稱其孝弟鄉黨敬其仁義蓋呂氏之積累其來久矣至府君家益昌而其材又有足用者苟出其緒餘稍自見於

世宜不止為一鄉之善士而已。顧乃歛藏弗耀而優游以卒歲。豈不曰為善之報自有其時乎？府君二子雖早世而孫曾蕃衍。生今昭代必有能自致顯融而大亢其宗者。為之銘以勗之。且以俟也。銘曰：

有伏必興。斯理之常。惟德之厚。其流乃光。于嗟府君。隱居行義。施澤於人。而不有位。保其世德。望于一鄉。繩繩子孫。積善之祥。亦既有子。胡又夭闕。百年之積。鬱而不發。是繼是述。在其孫曾。尚克有聞。天寵是承。貤恩所加。賁及窀穸。惟銘可徵。勒此貞石。

富陽朱君墓誌銘

富陽江沂流西行三十里東山之下。有隱君子曰朱君。既歿。且葬其孫天麟。以父命奉先友鄉貢進士陳君杞所為狀。請文為

銘按狀君諱伯清字源之世為杭之富陽人曾大父安禮大父
璘父起南俱隱德弗耀君少無他嗜好唯劬書至忘寢食群居
誦說務以道義相切磋磨不專取為舉子業也叔父起渭調太平
當塗尉携以謁郡守高侍郎衡孫侍郎前輩慎許可見君丰姿
秀整叩以所學甚器重之會科舉事廢君因得四其力於聖賢
之遺言所為詩文益就平實平居訓其家以儉而於周人之急
無所靳歲所輸二稅恒先期畢繼之者以自後為耻有鬪訟輒
開諭之使解去里中賴以無事民至有不識吏者瀕江故多盜
聞君之風相戒無敢犯客舟下上必以君為依歸縣尹李侯質
號剛介罕與人接慕君之為人歛門請見詢政事失得君為言
酒權及興造顧買之病民者數事尹施行如君言人至今稱之
初君所與為師友皆知名士後多取科第或班朝行君故未脫

塲屋不以寘欣戚也又嘗與故尚書右丞葉公李同事宋太學
博士施先生南一時先生之門惟右丞年最少君察其有志氣
以語當塗府君厚遇焉已而右丞以京學生扣閤斥言時宰創
市田變楮諸新法非便得罪授漳州州朋從懼莫敢省君獨往與
之訣且為具食飲服用之物俾所親送之二千里外其免歸也
君逆之江上無一語相勞苦第勉以風節自終至元間右丞用
薦者驟居政路士爭附趨恐後君顧漠然若未始有雅故者右
丞念君不置數遣迎致之卒謝弗往由是終其身不有仕籍人
尤以是高之君卒於大德十一年十二月某日年七十有二配
吳氏先若干年卒泰定某年某月某日合葬于所居南三里馬
鞍山之陽子男二人長曰文韶使來請銘者也次曰應申已卒
孫男四人天驥天騏天鵬天麟曾孫男九人女四人銘曰

有往而弗返莫予遏也有發而弗舒莫予竭也茲昔賢之細事
世駭以為索也幽幽其潛昭昭其晰也陵耶谷耶不尚有揭也

鄧胡君墓誌銘

鄧胡君以至治二年六月甲午卒年七十有三其又明年某月
某日葬城西南六十里亭嶺下前事諸孤衰經哭奉董生復禮
之狀踵門再拜請父為銘予為之荅拜且辭則又再拜固以請
乃次而銘之按狀君諱珙字伯玉本費氏子生七年後胡氏胡
氏自君之曾大父祖李大父桂發父德潤皆未有仕籍至君始
以材見推擇為郡列曹掾非其好也用久次司郡倉積勞當序
遷輒棄不就其居家奉母孝率子弟治田廬生產悉有法有餘
財未嘗資以為俚俗華靡豪縱事尊官顯人慕而與之交不肯
為翕翕熱然如故舊煦煦有恩歲時問巷相過雖賤夫幼童必

踈踈然與為禮有疑其矯飾者迨君病革姻黨朋從來候問度
且弗起咸有戚色君續息垂絕猶舉手加額曰惶恐惶恐疑者
乃釋然服其出於至誠君平生無他好玩獨嗜蓄古法書名畫
持以售者歸其直累百金無所靳晚益聚書構精舍小溪上延
師儒教諸孫為舉子業葬地實在其西十里君所自辨之也盖
君於管郭之學甚邃云君娶鍾氏子男六人曰元堅曰元垕曰
元垚曰元基曰元堂曰元圭女一人未笄孫男十有三人鏞鑑
鎮鈞錡銘鉅鑄鎰銳錫錯鉉女十人婿曰俞祖錫張景松餘在
室曾孫男二人宏翁興翁嗚呼予聞有隱德者必有後觀君之
自信獨樂非能以利澤昭被于人而子孫茂衍若是宜有隱德
矣其所恃以為不朽者獨銘也哉銘曰
維古宅兆眠占從違允矣胡君蔽志不疑我擇我藏匪卦于著

有封斯隆有潛弗輝有斐其銘嗣人之思

蔣君墓誌銘

潛弱冠時及石先生之門聞先生當宋景定咸淳間執弟子禮者恒以百數顧生晚不得廁其列然竊心慕之先生歿十有六年而潛為諸暨州判官始識蔣君陶朱山中扣其師友之淵源則執弟子禮於先生者也君不以輩行自高言必稱同門若嘗與游與居者焉會有

詔賜高年帛郡檄潛奉以從事潛方

躋君之門而君已死將葬其子果以狀來謁銘潛不得辭按狀君諱朋龍字飛卿蔣氏由漢兗州刺史誦二十四世至唐尚書左丞洙又十七世至宋國子監主簿某監簿生處州教授穎教授生國子助教翥助教之子曰一德君之高祖也曾祖諱嗣興祖諱允叅父諱亨之皆不仕其自宜興徙越之諸暨迨君九世

矣君先娶姜氏前三十七年卒有子一人果也後娶楊氏有女
二人長適胡一中起進士為紹興錄事次適趙深孫男三人曰
某曰某為兄進武校尉純後曰某初助教君無恙時有異僧空
入其室示以八字曰傳燈佛祖涅槃會人揖而與之語弗顧而
去他日以其言驗之壽略如瞿曇氏其歿則雙林唱滅之後一
日也自是君之祖若父得壽同歿之日又同君之死也夢其父
曰燈燈續傳不自我後不自我先寤而謂果曰吾先世之聞於
浮屠氏者固非所敢知以今之年明之日徵之殆與吾夢協吾
其逝矣即索紙筆為書與親友訣翌旦正襟危坐奄然而逝泰
定四年二月十六日也享年八十有一葬以某年某月某日墓
在某鄉某原銘曰

有生之不齊兮寔命自天脩不可強促兮短不可苟延天胡厚